


大清會典

九



內閣文庫			
函	冊	號	類
四九	一八	九	漢
一	四	九	書
架	冊	號	類

內閣文庫			
函	冊	號	類
五九	一八	九	漢
一	四	九	書
架	冊	號	類

內閣文庫			
番號	漢	1899	
冊數	141	(9)
函號	295		1



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



大清會典卷之十

考功清吏司

吏部八


淺草文庫

郎中員外郎主事掌內外文職官吏考察之典。凡論劾釋免及引年稱疾諸事皆得稽之。

考滿

國初典制內外官三年考滿視其稱職與否而黜陟從之。即古三載考績遺意。康熙四年停止考滿。專事京察大計。其舊制仍備錄於此。

凡各官考滿天聰八年初次舉行。令部院衙門官。所有過犯。備開考覈。○崇德二年定。官員辦



事勤敏稱職。而無過犯者。准加授官爵。○八年定。各官辦事勤慎。考註一等二等者。雖有小過。亦准加授官爵。○順治四年定。各官於考滿前。或已陞授官爵者。今遇考核。俱不准重加官爵。怠惰庸劣者。革職。○九年題准。在內四品。在外布政使以下各官。俸滿三年。移送吏部都察院考核。分爲稱職。平常。不稱職。三等具題。○又題准。督撫照在京官考滿。○十二年題准。各官三年考滿。如有過期不給由者。聽部院糾叅。○十三年議准。考滿稱職者。給與

誥勅。○康熙元年議准。京官四品。外官布政使以下。考滿分爲五等。辦事一等稱職者。紀錄一次。若此後緣事議處。准其抵銷降一級。辦事二等稱職者。止加賞賚。平常者。照舊供職。不及者。降一級調用。不稱職者。黜革。○又令各官遇有陞缺。俱照考滿等第陞轉。○二年議准。二等稱職者。改註勤職。○又諭內外官。俱於康熙三年起。每三年彙考一次。其到任未及三月者。不與。○三年題准。考滿官員。應將所辦職掌。及何事奉

旨改正。何事駁回。何事議處。詳明開載。考註一等二等者。在內由該衙門堂官。六科都給事中。在外由督撫。保舉賢能具題。○又題准。京官考滿。一人一疏。彙齊具題。外官考滿。各直省將所屬一等者一疏。二等者一疏。平常者一疏。不及者一疏。不稱職者一疏。亦彙齊具題。下部院衙門覆考。○又議准。內外官未經考滿陞轉者。於新任內考滿。凡三品以上京堂官考滿。舊例令其自行陳奏。黜陟取自

上裁。准復職者。給與

誥命。

賞賜。漢官復廕一子入監讀書。應否加銜加級。察例奏請。亦取自

上裁。○順治十八年議准。滿官照漢官例。准其廕子。○康熙元年議准。三品以上官。雖經陞調。食俸相同者。俱通理前俸考滿。○三年議准。尚書。左都御史。轉大學士。及各部院尚書。左都御史。互相轉補。各部院侍郎。互相轉補。併通政使。大理寺卿。宗人府府丞。轉副都御史。俱通算前俸。若

學士。副都御史。通政使。大理寺卿。宗人府府丞。陞侍郎。俱不算前俸。學士。副都御史等官。陞巡撫。巡撫陞總督。亦不算前俸。

凡四品以下京官考滿。舊例四品堂官令其自陳。黜陟取自

上裁。其餘官。考註稱職者。題請復職。順治九年題准。四品京堂官。將所行事實開列。移送吏部都察院考核。五品以下。由各堂官。及掌印官。填註考語。送吏部都察院覆考。○十八年議准。滿洲三品郎中。原係自陳。今令該堂官考核。滿洲六品

以下官。原未考滿。今俱准考滿。○康熙元年題准。僉都御史。四品正卿。國子監祭酒。六科都給事中。及中書科。行人司。上林苑監等衙門掌印官。咨送部院考核。其餘官員。俱由各衙門堂官。及掌印官註考。移送部院。○又議准。部院官陞轉。食俸相同者。俱准通理。○三年議准。僉都御史。令其自行陳奏。中書科中書舍人。專管誥勅。聽內院考核。○又議准。各官已經陞轉。俱不算前俸考滿。

凡鴻臚寺鳴贊。國子監典簿等官。及太常寺雜

職。欽天監。太醫院官考滿。例不具題。俱由該衙門堂官考核。咨送吏部都察院覆考註冊。○順治八年議准。欽天監。太常寺。太醫院官。九年考滿。有缺陞任。無缺陞俸二級。○康熙二年議准。欽天監等衙門官。九年內考滿。三次俱一等者。將二次考滿。各准紀錄一次。給表緞外。其第三次考滿。陞俸一級。仍給表緞。

凡在京所丞。大使。副使。司獄。雜職考滿。舊例具題。順治十二年題准。照例查核註冊。不具題。

凡各部院衙門筆帖式。舊例不考滿。康熙元年議准。筆帖式與有職掌官員一體考滿。由各衙門堂官填註考語。分爲稱職。平常。不稱職。三等。移送吏部都察院覆考。註冊。不具題。○二年題准。筆帖式考滿。亦照有職掌官員例。分爲稱職。勤職。平常。才力不及。不稱職。凡五等。其考註優等者。照例先用。有不及者。無級可降。卽行黜革。○三年議准。考註一等稱職。二等勤職者。照例開列實跡。保舉賢能註冊。

凡外官考滿。舊例俸滿三年。吏部咨行戶禮兵工四部。查覈。必錢糧全完者。方准考滿。○康熙

元年議准。外官或錢糧盜案未清。冒稱考滿。或歷任三年。規避不考。或明知屬官俸滿。不行考覆者。一併題叅治罪。○二年議准。考滿各官。將任內錢糧事實造冊。送布政使糧道。并按察使經管道府。申詳督撫。核實註考。造冊咨送吏部都察院覆考具題。如部院衙門需索。許科道據實糾叅。若外省借名暗派民間者。該督撫嚴加叅處。○又議准。司道歷腹俸二年。邊俸一年半。有司歷邊俸二年半。腹俸三年者。卽與考滿。○又議准。外官考滿。據督撫開報。並無未完錢糧

事件。部院按冊磨對。查其果無叅罰事故。卽准考滿。不必於戶禮兵工四部咨查。○三年題准。外官考滿。分別地方開註。若地方荒殘者。必詳開舊有荒地逃亡若干。三年內墾地增丁若干。以增墾多者爲一等。少者爲二等。仍舊者爲平常。復荒復逃者居下。其衝疲地方。必詳開三年內支應幾次兵馬差使。不致擾民。解過幾次餉銀。不致有悞。並拿獲逃人若干。酌量分爲等第。其充實簡易地方。則以操守廉靜爲上。詳開三年內錢糧有無加耗。行戶有無虧損。刑名有無

苛罰。除弊政幾事。緝盜案幾件。揭送衙蠹幾人。修治水利幾處。斟酌多寡。以定等第。以上四項地方。若各有優等。則荒殘而兼衝疲者先陞。荒殘者次之。衝疲者又次之。充實與簡易者居後。○又題准。州縣各官。并府首領雜職考滿。令知府會同推官註考。併送該管道官。考核。布按二司。轉詳督撫。知府考滿。令該管道官。布按二司。會同考核。轉詳督撫。同知。通判。推官。考滿。令知府考核。申詳該管道官。布按二司覆核。轉詳督撫。各道並布按都運四司首領官考滿。令布政使按察使考核。註送督撫。布政使。按察使考滿。專責督撫填註考語。其各官考滿冊內。必將本官申文。及各上官註考日期。或有駁查事件。明白開註。○又題准。考滿各官。以本官申文日爲始。扣至督撫咨送日期。定限三箇月。咨冊內將本官申詳月日。並駁查寬限緣由。詳明載入。如司道各衙門遲延。聽督撫指叅。督撫遲延。聽部院指叅。○又題准。州同。州判。以下各官考滿。查核明白註冊。不具題。

凡罰俸降革官員考滿。順治四年定。官員雖有

過犯亦准考滿○十八年題准。內外官因公革職。仍留任者。三年無過。准其考滿。應否復職。請旨定奪。其因公註誤降級留任官。考註稱職者。所降之級。應否開復。吏部題請。

上裁○康熙元年議准。內外官除降級罰俸。實歷三年者。方准考滿○二年題准。部院大臣降級者。不必待其復級。罰俸者。亦不必扣除月日。但計歷俸三年。卽令據實自陳。其內外各官。亦照此例○又議准。革職留任者。不准考滿。

凡考滿賞賚。順治十四年議准。部院衙門一品堂官。賜羊酒。表裏各四疋。二品堂官。賜羊酒。表裏各三疋。三品堂官。賜表裏各二疋○康熙元年議准。各官考滿一等二等者。在內四品五品官。在外四品巡撫。及布政使以下四品官。賜表裏各一疋。在內六品以下。在外五品以下官。賜表一疋○三年議准。筆帖式考滿。賞賚與有職掌官員同○四年停止考滿。

朝覲考察

國家定制。外官三年一朝。朝畢。吏部會同都察院吏科河南道考察。奏請定奪。來朝官引至

會典卷十
御前宣讀誠諭仍各

賜勅一道。若廉能卓異。貪酷異常。則有黜陟之典。以示懲勸。具列於後。

凡外官朝覲。順治四年定。三年大計。永爲定制。其考察事宜。仍照舊例舉行。○九年題准。布政使有因軍需緊急。勢難離任者。許委各道代覲。預行奏明。臨期不准題請。無事地方。不得援以爲例。○十二年題准。各省令布按各一員。府佐各一員來朝。○十八年議准。奉天府屬官。照各省例入覲。○康熙元年題准。布政使。按察使。免

其朝覲。令各道官代行。○又議准。停止大計。內外官俱行考滿。○四年題准。停止考滿。復行大計。○六年議准。每省布按各一員。每府佐貳各一員。賚冊入覲。其貴州東川府土人。不通文教。應免來朝。○又題准。上司將不應朝覲官。悞行差遣者。罰俸六箇月。○十年題准。直隸守道。巡道。令照外省布按例入覲。○十二年題准。布政使。按察使。應親身入覲。其各道官代覲。永行停止。○二十五年覆准。布按府州佐貳官來朝。概行停止。每省各委道官一員。賚冊入覲。

凡外官填註考語。順治三年定。用才。守政。年。四格。才則或長。或平。或短。守則或清。或平。或濁。政則或勤。或平。或怠。年則或青。或中。或老。其考語務按人指事。應去應留。明白直書。不得鋪敘繁文。徇情毀譽。○又定在外官評。全憑撫按。如有賢否倒置。不合公論者。聽部院堂官。及科道。據實糾叅。以溺職論。○九年題准。官有改節。勿因前薦後叅。而存顧忌。事有已著。勿因去任。現任而生偏私。道府考州縣不公。先叅道府。布按察道府不實。並叅布按。○十二年議准。道員賢否。

布按不許徇情。以陞任去任者塞責。倘開報不公。督撫按糾劾。如有容隱。科道指叅。學道必公。明服衆。方列上等。有司優劣。責督撫按虛公察核。果有實心爲民。治行卓異者。卽當獎薦。以勵官方。佐貳官如才守平常。年力衰老者。題請罷職。雜流斥逐。○又議准。撫按造送計冊。果另有灼見。許特疏直奏。庶免扶同。○十五年題准。各官履歷年歲。核實開列。何事叅罰。何日開復。及現任叅罰戴罪等項。逐一詳載。不得隱匿。○又議准。大計官評。務期詳慎。責成本道本府開報。

署官不必造冊。其計處各官。不得苛求去任。刻責卑官。併將已經處分之官。舊事塞責。○又議准。州縣佐貳首領屬官。令州縣正官開造賢否事實。申送本府。知府將所屬知州知縣佐貳首領屬官。填註考語入冊。送本管守巡各道。教官送學道。轉呈布按二司覆考。經督撫按考定。彙冊咨達部院等衙門。直隸州知州不屬府轄。知府不註考語。其直隸州所屬各縣。悉從知州考核。○又題准。直省各官註考。如遇卓異貪酷等官。即明註冊內。○十八年議准。布按衙門。叅政。叅議。副使。僉事。及首領屬官。俱從本

衙門正官註考。仍令布按二司互相考核。○又議准。守巡道俱有統轄之任者。令會註一行。○康熙六年題准。直省督撫。應將所屬官員事跡過犯。逐員指實開註。如賢否倒置。令部院科道指叅。○十一年議准。應處分各官註考。各照入法開載。入法詳見於後凡京府各官考語。順治十五年題准。除府丞例隨京察不入大計外。治中。通判。首領。雜職。令府尹填註考語。宛平。大興等州縣正佐各官。由府尹及專管道員註考。俱送該撫覆考咨部。○康

會典卷十一
熙六年議准。奉天府府丞。并京縣典史等官。雖在京考察。仍應照例入大計冊內。其奉錦二府所屬各官。責令府尹註考。○八年題准。順天府屬州縣教職等官。由府尹註考。造送部院。凡直隸有司等官。康熙八年題准。直隸府州縣各官。由專轄道員註考。其守巡二道。各照錢穀刑名項下。評定優劣。另填考語。真定等七府各屬教職。由該管府道註考。送學院考定造冊。達部院衙門。

凡上林苑監監丞。蕃育署署丞。良牧署署丞。考語。康熙九年題准。聽上林苑監監正考核。造冊送部院衙門。

凡布政使。按察使。舊例由督撫巡按註考。順治十五年議准。布按兩司。互開賢否。撫按細訪核實。奏報。○十六年議准。布按兩司。不必互開賢否。憑督撫巡按採訪。分別薦劾。凡鹽運使。海鹽道考語。順治六年題准。照各道官例。令布按二司。填註考語。

凡鹽運司運同。運副。運判。提舉及首領屬官考語。順治六年題准。令各衙門正官考核。呈布按

二司覆考。申送督撫按。○十五年題准。長蘆運司運判首領屬官。止從本衙門運使註考。徑送撫按。

凡離任官員考語。順治六年題准。與現任官一同造報。○十八年題准。丁憂官。于原任考核。陞轉。降調官。離任一年以上者。于新任考核。未及一年者。于舊任考核。○康熙六年題准。解任官。除督撫糾叅貪劣者。不註考外。其餘或一事論劾。或彼此訐告者。亦宜詳註考語。不得因一時緣事。遂畧平日政績。○又題准。老病。休致。終養。

等官。不必註考。丁憂。裁缺。降調官。未經補授者。仍于原任註考。○九年題准。離任之官。或應註考語者。不註。或不應註考語者。違例填註。或開報年貌互異。或遺註去留字樣者。俱罰俸一年。督撫罰俸六箇月。

凡露章題叅。順治十五年議准。果有奇貪大酷。令督撫按露章糾叅。勿庇現任。而苛去任。勿寬大吏。而責卑官。如開報不實。聽科道糾叅。○又議准。外官若錢糧號件。積至十件未完。或遲至二三年不結者。聽撫按隨大計冊露章特叅。○

康熙十年題准。露章爲特糾重典。必係貪酷官員。例應提問者。方行題叅。不得以老病不及等官充數。○十一年議准。官員被叅款蹟。審虛者。仍照冊內考語處分。

凡朝覲大計文冊。順治三年定。賢否冊籍。限十一月內到部。以憑磨勘會叅。○十二年議准。各督撫造冊三本。一投吏部。一投都察院。一投吏科。毋得叅差。○十五年議准。府州縣各役。賫冊彙繳布政司親投。各役不許入城。違者拿究。○又議准。冊籍俱限十二月二十五日到齊。○康

熙六年議准。朝覲文冊。俱限十月二十日以前賫到。○九年議准。戶口錢糧刑名逃盜屯餉等項冊籍。各省布按都三司造送。其府州縣衛所。槩令停造。○又令大計文冊。限十二月內到部。○二十五年覆准。督撫將所屬官員賢否文冊。止造三本。送吏部。都察院。吏科。其布按二司。所造各官賢否。及錢穀刑名等項冊籍。分送各部院衙門者。俱行停止。凡朝覲大計考察。順治四年定。吏部考功司。會同吏科。河南道。俱于開印次日。會同封門。詳閱

冊籍。吏部都察院堂官。再加察核。考功司先期知會吏科河南道。赴部開門。出示曉諭。來朝官。查照限期入城。先赴考功司投遞職名。候過堂考察。○十八年議准。考功司。吏科。河南道。詳核各官應去應留者。照八法議處。吏部都察院堂官。嚴核。如冊內賢否倒置。造報不實者。科道特疏指叅。

凡朝覲官條奏。舊例考察糾拾事畢。請期朝見。面賜誠諭。其布按各官。如有地方情形。及興利除弊諸事。各具本奏聞。○順治十五年議准。各官疏

冊投送通政司。如有參差。及未投送者。聽該司指叅。布按奏章。限正月初十日以內。次第入告。○康熙二十二年題准。布按及代覲道官條奏本章。不必投遞通政司。于各衙門啓奏後面陳。令通政司滿漢堂官各一員指引。科道掌印滿漢官左右侍班。先一日知會都察院通政司。吏科遵行。○二十五年覆准。布按免其入覲。其奏章亦行停止。

凡八法處分。舊例貪酷。並在逃者。革職提問。罷軟無爲。素行不謹者。革職。年老有病者。勒令休

致才力不及。浮躁者。照事跡輕重。酌量降調。雖有
有加級紀薦。不准抵銷。○順治九年題准。大計處分
官員。不准還職。○十三年題准。兩經大計處分才力不
及官員。照罷軟例革職。○康熙六年題准。官員浮躁者。
降三級調用。才力不及者。降二級調用。

凡卓異官員。順治七年議准。卓異官紀錄卽陞。仍

賜衣一襲。以示激勸。○十年題准。卓異官。先行紀錄以
備優擢。○又題准。官員必才守俱優。督撫方會疏特舉。
○十五年題准。同知知州。政蹟卓異者。准陞知府。其餘各
官。照應陞職銜。不拘俸薦先用。推官知縣。若已經行取陞
補主事者。遇考選時。仍與各主事一體開列。○又題准。官
員首重才品。兼論資俸。必錢穀全完。聽訟明決。城守鞏固者。
方准特舉卓異。若到任未及年餘。不得濫舉。○康熙元年
題准。卓異官。錢糧全完。督撫奏報錯誤者。與本官無涉。仍
照實政考語查議。○六年題准。司道以下。推官以上。必註
明不科。派節禮。不索取小費。不借端勒詐屬官。不生

事煩擾百姓。知府以下。知縣以上。必註明不科
派雜差。不索取火耗。不虧刻行戶。不强貸富民。
方准特舉卓異。○七年議准。各直省知縣中。如
有才守兼優。無錢糧盜案叅罰者。督撫及司道
需索留難。不行舉報。或被部院察出。或經科道
糾叅。將督撫各官。從重治罪。○十年題准。卓異
官員。查閱吏部冊籍。若有未完事件者。不准。併
將題薦之督撫等官治罪。○十二年題准。官員
必能興行教化。無未完錢糧盜案者。方准疏舉
卓異。○二十四年議准。各省布按停其薦舉卓

異。○又議准。薦舉保舉府州縣官。第一條令填
寫一無加派火耗等字樣。第二條令填寫一實
心奉行

上諭。每月吉聚衆講解等字樣。如無實蹟。妄行填寫
保薦者。照例處分

凡薦舉卓異不當者。康熙六年覆准。督撫濫將
貪酷匪人。徇情特薦者。經科道糾叅情真。督撫
降二級調用。申詳之司道府官。降三級調用。如
薦舉卓異後。原任內有貪酷不稱職事蹟。而原
薦舉各官。卽揭報題叅者免議。如不揭報題叅。

發覺時亦照例議處。其薦舉卓異官或經陞轉。新任內有貪酷擾民事蹟者。原薦舉之督撫。司道府官俱免議。如薦舉有未完錢糧盜案者。督撫罰俸一年。申詳之司道府官降一級調用。○九年議准。錢糧盜案未完官員。薦舉卓異者。督撫罰俸六箇月。申詳之司道府官。罰俸一年。○十二年議准。官員雖無錢糧盜案。而未能力行教化者。督撫司道府等官。濫舉亦照例罰俸。○十八年議准。濫將匪人徇情薦舉者。督撫司道照定例處分。俱降實級。雖有加級薦紀卓異。卽陞。俱不准抵銷。

凡朝覲官員回任。舊例查照水程。立定期限。違者照憑限例議處。○康熙元年議准。朝覲事畢。各官赴任水程。吏部移送吏科。註限給發。凡大計應用物料。順治十年題准。造冊刊報等紙。六千九百張。本章紙。一千四百張。榜紙。一百七十張。銀硃二匣。靛花二觔。筆六百二十五枝。墨七觔。炭四千觔。大油燭三百枝。移咨戶工二部支給。○十二年題准。設紀錄科。登記內外官降罰等項。增給榜紙一千張。扛連紙一千張。

京官考察

內外官員考滿之外。復有考察。外官考察。詳見朝覲。其京官考察。以六年爲期。俱于二月內舉行。康熙四年停止考滿。專事京察。其填註考語。處分條例。具列於後。

凡京官考察。順治十三年議准。在京各衙門屬官。不論現任。陞遷。公差。丁憂。告病。養親。給假。降調。及行查未結者。俱聽本衙門堂官考核。照外官考察格式。填註考語事蹟。或賢或否。應去應留。造冊密送吏部都察院吏科河南道。以憑會

考。如將應考官員遺漏。不應考官員。造入冊內者。聽部院糾參。○又議准。六年陞調不一。若會同參註。及開推諉遺漏之端。應專責見任考察。○又題准。吏部都察院吏科河南道。封門閱冊。公同磨對。過堂考察畢。各衙門掌印官。俱赴吏部衙門面議後。卽行具題。○又議准。遇京察時。大小各官。俱暫停陞轉。候事畢出榜後。照常舉行。○又議准。吏部封門後。科抄中有應處分各官。亦俟京察事畢查議。○康熙元年題准。各旗以才能咨送補授部院衙門官員。未及半年者。

亦由見任衙門註考○十一年議准。京察文冊。各照八法填註考語○十八年題准。陞轉降補各官。到任半年者。于新任衙門註考。未及半年者。于原任衙門註考

凡京堂官自陳。順治十三年題准。三品以上京官。及在外督撫。具疏詳開履歷。及有無過犯。據實自行陳奏。取自

上裁。其出征奉差。丁憂。告病。養親。給假者。俟回任之日。行查未結者。俟事結之日。俱令自陳○康熙元年議准。

盛京四部侍郎。照例自陳

凡覺羅官員。順治十三年題准。部院會同宗人府考察○康熙十二年題准。聽宗人府考察○又題准。各部院衙門覺羅官。由該部院衙門註考。移送吏部都察院考察

凡四品以下京官。順治十三年題准。四品京堂。亦令自陳。下部議去留。五品以下。不論堂屬。俱聽部院會同該衙門考察○康熙元年題准。四品京堂。令咨呈部院考察。惟僉都御史。在京者。有考察之責。在外者。係封疆大吏。仍令自陳○

六年題准。在京僉都御史。各衙門少卿以下官員。俱由各該衙門開列考語。移送部院。○十二年題准。四品衙門各官。由正卿少卿及掌印官註考。其正卿少卿及掌印官屬部兼轄者。由該部堂官註考。不屬部兼轄者。冊內詳開行過事實。不註考語。移送部院考察。

凡內閣翰林院詹事府各官。順治十三年議准。少詹讀講學士。左右庶子。俱令自陳。其餘各官。令部院會同大學士。學士。詹事府堂官。一體考察。○康熙六年題准。侍讀學士以下各官。俱由該衙門開列考語。移送部院考察。○十八年題准。少詹事以下各官。亦聽詹事註考。移送部院考察。

凡六科給事中。順治十三年題准。吏科都給事中。將六科各官。行過事蹟。開列冊內。不註考語。彙送部院。○康熙元年題准。六科左右給事中。并給事中。俱聽都給事中填註考語。○十二年題准。不分掌印給事中。與給事中。俱將行過事實。開列冊內。不註考語。由吏科移送部院。凡國子監官。順治十三年題准。由禮部會同祭

酒司業註考。開送部院考察

凡欽天監官。舊例免考。康熙六年題准。與京官一體考察

凡太醫院官。由該衙門正官考核。申送禮部。禮部送部院覆考

凡四譯館屬官。舊例由禮部註考。康熙十二年題准。聽本衙門掌印堂官。註定考語。送禮部覆考。轉送部院

凡順天府縣各官。順治十三年題准。治中通判等官。聽府尹註考。開送部院

凡盛京及奉天府各官。康熙六年題准。照在京官例一體考察

凡各部院衙門筆帖式。順治十三年題准。照有職掌官員例一體考察

凡營繕所所丞。原係工部所屬。向入京察。康熙六年議准。部差裁革。歸併地方官管理。改入外官大計。○九年題准。部差已復。將所丞仍隸京察。聽該部註考

凡京察處分。順治十三年題准。年老。有疾者。致仕。貪酷者。革職。罷軟。無爲。素行不謹者。給頂帶

閒住滿官罷軟不謹者。革退衙門。浮躁。淺露。才力不及者。降

一級調用。○康熙元年題准。貪酷者。革職拿問。

罷軟。無為。素行不謹者。革職為民。浮躁淺露。才

力不及者。降一級調用。滿洲蒙古。調部院用。漢軍漢人。調外用。○

六年題准。才力不及。有疾者。降一級休致。老病

者。原品休致。○九年題准。才力不及者。降二級

調用。浮躁者。降三級調用。雖有紀薦加級。不得

抵銷。止准帶于所補新任。

京官甄別

在京官員。六年考察之外。間行甄別。係奉

特旨舉行。其考核事宜。原無定制。今錄其大畧于後。

順治十年

諭。在京官員。除吏禮二部侍郎。學士。詹事等官。親加

考試區別外。其六部等衙門。有年老疾病。不能任

事。及素行不孚眾論。或才力可外任者。俱令本衙

門堂官。詳察嚴核。彙送吏部都察院。同吏科河南

道議奏。其通政司。大理寺。太常寺。太僕寺。等衙門

堂官。開送吏部都察院。吏科河南道察核。其六科

各道御史。吏部都察院。察核具奏。各衙門務秉公

開列。俱限五日內。即為分別。不得遲延推諉。以滋

會典卷十一
三
賄託○又

諭總督巡撫亦行甄別○又議准考核督撫應察其蒞任以來入告章奏所行事實奉過

諭旨與舉劾當否吏部詳錄一冊至

欽件完欠封疆功罪河漕利弊賊盜曾否勦除逃人曾否嚴察錢糧果否清核刑名有無寃滯戶禮兵刑工各部俱按職掌詳錄一冊移送部院虛公察核參詳輿論以定去留○十七年

諭甄別在京官員大學士尚書等俱令自陳三品以上官開列職名題請四品以下官及在外總督巡

撫部院卽詳加甄別具奏○又題准甄別之時各官俱暫停陞轉○康熙八年

諭甄別京官三品以上堂官令其自陳四品以下及各督撫令部院如舊制考察○二十年復行甄別諭吏部都察院將各衙門堂官開列具奏其各衙門屬官吏部都察院會同該堂官分別考核具題

凡甄別處分順治十七年題准怠惰不能任事者革職年老有疾者致仕才力不及不孚衆論者視其考語輕重酌量降級滿洲蒙古降補旗缺漢軍漢人降補外官其才堪外用者滿洲蒙

古照原品調補旗缺。漢人照原品調補外官。○
十八年題准。甄別有病休致官。查驗病痊。仍照
原官起用。○康熙八年題准。甄別各官。或註才
力不及者。或註不孚衆論者。俱降二級。若才力
不及。復不孚衆論者。降四級。滿洲蒙古漢軍。調
補部院衙門。漢人調外官。其才堪外用者。漢人
降一級調補外官。滿洲蒙古漢軍。降一級隨旗
上朝。
十一年議准。甄別文冊。各照京察八法填註議
處。不得仍用衆論不孚字樣。

考察通例

夫計京察甄別事宜。已分類備書于前。其科道
拾遺。及申辨冤抑。嚴禁請托等項。不分內外考
察。事例相同者。併載于後。

凡計察遺漏官員。聽科道糾叅。順治四年定。糾
拾各官。與計冊賢否互異。各撫按或據開報失
實。或因道里遙遠。一時不及周知。槩行免究。仍
著該撫按照原叅款單。虛公詳審。不得枉縱。○
十年

論。科道糾拾官員。照大計例議處。如科道官挾私妄


奏聽吏部都察院題叅○又題准科道糾拾官員下部覆核按八法處分其賍私有據者提問追擬或有冤抑者于督撫按處辨理果係虛罔准其還職其原糾拾科道查無挾私情弊亦免處分○十二年題准科道糾拾非奇貪異酷必巨惡神奸非布按兩司必道府方面不得苛求細節槩及有司○十三年題准京察官員亦聽科道糾拾○又題准科道官內有應降黜而考察遺漏者仍令科道互相糾舉○又題准科道糾拾令公疏指叅以杜報復風影之弊至所糾者必係緊要衙門或有關吏治刑名錢穀諸大事不得濫及散秩摘發細故○十五年議准外官于大計冊內考註優等科道以貪酷指叅發審有據者該撫按一併治罪○康熙六年

諭言官若有所見既許不時陳奏其拾遺永行停止凡申辨冤抑順治十年議准考察處分官果冤抑情真許督撫按據實代奏吏部都察院覆核無異卽爲昭雪還職如督撫按明知誣罔不爲申理并行議處至本無冤抑妄行反噬者從重治罪○十三年題准考察處分官不許潛住京

會典卷十一
師刊刻款單。撫拾妄奏。違者不分有無頂帶。俱發口外爲民。○康熙十一年議准。處分官員。不得控告。註考官受賄侵勒。違者革職。無頂帶者。交刑部治罪。若止控告本身。冤抑不及註考官者。照叩

關具告通政司鼓廳例處分

凡請託禁例。順治十五年議准。朝覲官。不得餽送囑託私書。令五城御史。分貼禁示。嚴行緝拿。至在京官。將囑託情由。自行舉首者。吏部議敘。若扶同隱匿。經科道糾叅者。一併治罪。至奸棍摹倣圖書字跡。假開禮單。以圖詐騙者。亦令五城嚴拿重究。○十七年議准。京察甄別時。各衙門堂官。不許接見屬吏。吏部。都察院。吏科。河南道門上。各貼迴避字樣。不許接見賓客。如有囑託者。自行舉發。倘徇庇隱匿。聽科道糾叅。○十八年議准。五城將私書餽遺察出。及叅者。紀錄一次。



大正九年...

會典卷十

三

--	--	--	--	--	--	--	--	--	--

